

- जनगणना 2027 पहली अप्रैल ऊँ सरू व्हेला-पहला दौर मांय घर-घर री लिस्ट बणावण सागे जनता खुद गणना करावेला।
- मुख्यमंत्री भजन लाल शर्मा 1 लाख 22 हजार आंगनबाड़ी कार्यकर्तावां अर सहायिकावां रा खातां मांय 12 करोड़ 20 लाख रुप्या री रकम भेजी।
- राजस्थान माध्यमिक शिक्षा बोर्ड कानी ऊँ लीरीजी 12वीं कक्षा री परीक्षा रा नतीजा रो ऐलाण काल कर्यो जावेला।
- प्रदेश रा केई हलकां मांय अंधड़ अर बारिश रा समाचार।

000

जनगणना 2027 रो पहलो दौर एक अप्रैल ऊँ सरू व्हे रहयो है। महारजिस्ट्रार अर जनगणना आयुक्त, मृत्युंजय कुमार नारायण आज नई दिल्ली मांय खबरनवीसां ने आ जाणकारी दीनी। वे बतायो के जनता री दो दौर मांय व्हेवण वाळी गिणती रा पहला दौर मांय घर-घर री लिस्ट बणायी जावेला अर स्व-गणना करी जावेला।

000

मुख्यमंत्री भजनलाल शर्मा आज जयपुर मांय एक लाख 22 हजार आंगनबाड़ी कार्यकर्तावां अर सहायिकावां ने दो ड्रेसां सारू एक-एक हजार रुप्या री रकम सीधी वां रा बैंक खातां मांय भेजी। ई मौके वे आंगनबाड़ी केंद्रां री सालाना गतिविधियां रा कैलेंडर रो विमोचन ई कीनो। मुख्यमंत्री प्रधानमंत्री मातृ वंदना योजना, लाडो प्रोत्साहन योजना अर कालीबाई भील योजना रा पात्र लोगां ने मदद री रकम रा चैक ई संप्या। श्री शर्मा आंगनबाड़ी कार्यकर्तावां रा काम री सराहवणा करता थकां कहयो के वे बच्चां रो भविष्य संवारबा मांय खास काम कर रही है।

कार्यक्रम मांय मौजूद उपमुख्यमंत्री अर महिला अर बाल विकास मंत्री दिया कुमारी कहयो के राज्य सरकार महिलावां ने मजबूत बणावण माथे खास ध्यान दे रही है। वे कहयो के आंगनबाड़ी केंद्रां ने और बेहतर बणावण सारू लगातार जतन कर्या जा रहया है।

000

तेल कंपनियां राज्यां मांय कारोबार सारू रसोई गैस बराबर मुहैया करावणो तैय करण सारू कार्यकारी निदेशक लेवल माथे तीन सदस्या री समिति बणायी है। पेट्रोलियम अर प्राकृतिक गैस राज्य मंत्री सुरेश गोपी आज राज्यसभा मांय एक लिखित जवाब मांय आ जाणकारी दीनी। वे बतायो के आतूणी ऐशिया मांय मांय चाल रही लडाई रे कारण देश मांय दिवासर ऊँ मंगायी जावण वाळी रसोई गैस री तादाद माथे असर पड़यो है। श्री गोपी कहयो के भारत रसोई गैस री खपत रो करीब 60 फीसदी दिवासर ऊँ मंगावे है जिण रो लगभग 90 फीसदी होर्मुज जलडमरूमध्य ऊँ व्हेतो थको आवे है।

000

इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव कहयो है के इलेक्ट्रॉनिक्स घटक विनिर्माण योजना- ईसीएमएस रा तैत 61 हजार करोड़ रुप्या खर्च वाळी 75 परियोजनावां मंजूर करी ज्यी है। वे नई दिल्ली मांय खबरनवीसां ने आ जाणकारी दीनी। श्री वैष्णव ईसीएमएस रा तैत अर्जियां रा आवता दौर री मंजूरी ने भारत रा इलेक्ट्रॉनिक्स विनिर्माण सफर मांय खास उपलब्धि बतायो। वे कहयो के आं परियोजनावां ऊँ करीब 61 हजार करोड़ रुप्या रा निवेश अर देश मांय नौकरी-धंधा रा लगभग 65 हजार मौका बणबा री उम्मीद आसार है।

000

केंद्रीय कृषि मंत्री शिवराज सिंह चौहान कह्यो है के अब खेती-बाड़ी ऊँ निकाळबा वाळो कचरो काम ले र सड़क बणावण री डामर बणायी जावेला। वे आज नई दिल्ली मांय ई नुवी तकनीक ऊँ जुड्यो करार व्हेवण रे मौके बोल रह्या हा। कृषि मंत्री कह्यो के साखां री कटाई पाछे बच्योड़ा सामान रो इस्तेमाल व्हेवण काशतकारां ने और कमायी व्हेला। इण ऊँ प्रदूषण कम व्हेवण सागे ई पर्यावरण बचावण रा भारत रा लक्ष्य ने ई मजबूती मिलेला।

000

ई मौके विज्ञान अर प्रौद्योगिकी मंत्री डॉ. जितेंद्र सिंह कह्यो के भारत ने जरूरत रो आधो डामर दिसावर ऊँ मंगवाणो पड़े है, जो नुवी तकनीक काम लिया पाछे देश मांय ई बणायो जा सकेला।

000

राजस्थान माध्यमिक शिक्षा बोर्ड-आरबीएसई कानी ऊँ लीरीजी बारहवीं कक्षा री परीक्षा रा नतीजा रो ऐलाण काल कर्यो जावेला। सीनियर सैकण्डरी रा कला, विज्ञान अर वाणिज्य संकायां रा नतीजा रो संवारे दस बज्या ऐलाण कर्यो जावेला। शिक्षा मंत्री मदन दिलावर अजमेर मांय बोर्ड रा दफ़तर ऊँ नतीजो जारी करेला।

000

भूमि विकास बैंक री शाखावां ऊँ कर्ज लेवण वाळां सारू मुख्यमंत्री अवधिपार ब्याज राहत एकमुश्त समझौता योजना 2025-26 रो काल 31 मार्च ताई फायदो लियो जा सके है। राजस्थान राज्य सहकारी भूमि विकास बैंक रा प्रबंध निदेशक जितेंद्र प्रसाद आ जाणकारी दीनी। वे बतायो के पात्र सदस्य तुरत वां रा ज़िला रा सहकारी भूमि विकास बैंक मांय सम्पर्क कर र ऑनलाइन रसीद ले सके है।

000

राष्ट्रगीत वंदे मातरम् रा डोढ़ सौ साल पूरा व्हेवण रा सिलसिला मांय राज्य बीमा अर प्रावधायी निधि विभाग री ओर ऊँ न्यारा-न्यारा कार्यक्रम राख्यी ज्या। ई दौरान वन्दे मातरम् रा बारा मांय हिन्दी मांय निबंध लेखन री होड़ अर सांस्कृतिक कार्यक्रम राख्यी ज्या।

000

भीलवाड़ा पुलिस पेट्रोल, डीजल अर गैस री कमी री सोशल मीडिया रे जरिये अफवाह फैलावण रा आरोप मांय आज आठ जणा ने गिरफ्तार कर लीना। एस.पी. धर्मेन्द्र सिंह बतायो के आं लोगां माथे सोशल मीडिया रे जरिये जानबूझ र भरमावण वाळी जाणकारियां देवण रो आरोप है। ई बीचे, रसद विभाग ज़िला मांय 27 ठौड़ां ऊँ गैस री 132 टंकियां अर टंकिया भरण री मशीनां जब्त कीनी।

000

राज्य मांय टाइप-1 डायबिटीज अर सिकल सेल एनीमिया रो ईलाज और बेहतर बणायो जावेला। मुख्य सचिव वी. श्रीनिवास री सदरत मांय आज जयपुर मांय री मीटिंग मांय ई बाबत् विचार करी ज्यो। मीटिंग मांय पैली वाळा केंद्रीय स्वास्थ्य सचिव राजेश भूषण अर गैर सरकारी संस्थावां रा नुमाइन्दा ई सिरकत कीनी। मीटिंग मांय मुख्य सचिव टाइप-1 डायबिटीज रा ईलाज सारू सेंटर ऑफ़ एक्सीलेंस बणावण अर बांसवाड़ा, डूंगरपुर अर प्रतापगढ़ सरीखा आदिवासी ज़िलां मांय सिकल सेल एनीमिया रा ईलाज ऊँ जुड्या कार्यक्रमं ने मजबूत बणावण रा हुकम दीना। मीटिंग मांय 'मिशन मधुहारी' ने पीपीपी मॉड रे जरिये और असरदार बणावण रा बारा मांय ई विचार करी ज्यो।

000

राज्य मांय भणार्ई-लिखाई रो नुवो सत्र 1 अप्रैल ने सरू व्हेला। ई सारू प्रदेश री सगळी सरकारी स्कूलां मांय 'प्रवेशोत्सव-2026' मणायो जा रह्यो है। स्कूलां मांय नामांकन बधावण सारू अध्यापकां अर आंगनबाड़ी कार्यकर्तावां री टीमां घर-घर जा र सर्वे कर रही है। ओ अभियान 6, 10 अर 15 अप्रैल ने खास तौर ऊँ चलायो जावेला। शिक्षा विभाग ई सत्र रा पहला ई दिन ऊँ पढाई सरू करावणो तैय कीनो है।

ई बाबत् 1 अप्रैल ताई सगळी स्कूलां मांय किताबां मुहैया करावण री कोशिश करी जा रही है। विद्यार्थियां रा स्वास्थ्य री जांच सारू 16 अप्रैल ऊँ डिजिटल स्वास्थ्य जांच अभियान ई चलायो जावेला।

000

इंदिरा गांधी नहर मांय 10 अप्रैल ताई आंशिक नहर बंदी रहवेला। ई दौरान पंजाब रा सरहिंद फीडर मांय पीवण सारू डोढ़ हजार ऊँ दो हजार क्यूसेक ताई पाणी मुहैया करायो जावेला। ई पाछे 11 अप्रैल ऊँ 10 मई ताई नहर मांय पूर्ण बंदी रहवेला। अहलकार जनता ऊँ पाणी री हर बूंद काम लेवण री अरज कीनी है ताकि आवता डोढ़ महीना ताई पाणी री पूर्ति ठीक तरीका ऊँ करी जा सके।

000

भगवान महावीर रा जन्म रो उत्सव आज आखा राज्य मांय हरख-उमाव सागे मनायी ज्यो। ई दौरान भगवान महावीर रा सांच, अहिंसा अर जियो और जीने दो रो संदेश जनता ताई पूगायी ज्यो। ई मौके नवकार महामंत्र रो जाप ई करी ज्यो अर शोभा यात्रावां निकाली ज्यी। अजमेर मांय पार्श्वनाथ दिगम्बर जैन मंदिर ऊँ सोहवणी झांकियां सागे शोभा यात्रा निकाली ज्यी। रणकपुर अर श्रीमहावीर जी मांय ई ई मौके मोटी तादाद मांय जातरू पूग्या अर भांत भांत रा कार्यक्रम राख्यी ज्या। सलूमबर मांय निकाली ज्यी रथ यात्रा रो न्यारी-न्यारी ठौड़ां स्वागत करी ज्यो।

000

प्रदेश रा केई जिलां मांय आज जोरदार बायरो बाजण सागे बिरखा व्ही, जद के पंद्रह ऊँ बत्ता जिला मांय बादळा मण्डया रह्या। कोटा मांय दोपहरां पाछे ओळा पड़बा रा समाचार है, जद के अजमेर, श्रीगंगानगर, बीकानेर, नागौर अर चूरू मांय बिरखा व्ही। जैसलमेर मांय तेज आंधी चाली, जद के सवाईमाधोपुर, डीग, हनुमानगढ़ अर भीलवाड़ा मांय छांटो-छिड़को व्हयो। मौसम केंद्र जयपुर आज भरतपुर, कोटा, बूंदी अर बारां जिलां मांय बिजळी पड़बा सागे ओळा पड़बा सारू चेतायो है। मौसम महकमो काल ऊँ जोधपुर, बीकानेर, अजमेर, जयपुर अर उदयपुर संभाग मांय आंधी-बारिश रा आसार जताया है। ई सागे ई काल ई शेखावाटी हलका अर जयपुर, भरतपुर अर कोटा संभाग मांय कठे-कठे हल्की बारिश री संभावना है।

000

आईपीएल क्रिकेट मांय आज, राजस्थान रॉयल्स अर चेन्नई सुपर किंग्स रे बीचे मुकाबलो व्हेला। ओ मैच गुवाहाटी रा बारसापारा क्रिकेट स्टेडियम मांय अब ऊँ थोड़ी देर पछे साढ़े सात बज्यां सरू व्हेला। काल रात व्ह्या मुकाबला मांय मुंबई इंडियंस कोलकाता नाइट राइडर्स ने छह विकेट ऊँ हरा दीनो।

000